

四庫全書

集部

欽定四庫全書

山齋文集卷十六

明 鄭岳 撰

行狀

明旌表孝廉文林郎雲南道監察御史如賓陳  
君行狀

吾莆自林艾軒先生倡明道學一脈相承如綫然士之  
驚進取者率視之為迂談間知所從事又多矯飾無其

實甚至首尾衡決反為羣目之所指笑因噎廢食而盡  
疑道學之不足信亦過矣若吾友如賓陳君時周真所  
謂其人哉君諱茂烈貫浙江瑞安縣人聚族大川為著  
姓高皇帝初君之曾大父諱伯洪者從湯大夫定關中  
以功陞興化衛右所總旗護印管軍卒子慶四嗣慶四  
卒子善祥嗣是為君父贈文林郎吉安府推官母張氏  
封太孺人君幼有至性能勵志自立年十四喪父繼役  
書入公署協書文案夜歸讀書其祖母黃氏憐其孱羸

數止之乃韜燈默誦遂通舉子業年十八慨然嘆曰善  
學聖人者莫如顏曾顏之克已曾之日省豈非學之法  
歟於是作省克錄以自考冀父於九華山麓親負石為  
墳間日一至墓所越二年三日一至三年五七日一至  
至則拜號而返成化丙午授徒臬司憲副胡榮素以古  
學名與君語大奇之曰吾昔提學廣東見白沙陳公甫  
始聞道學精切又問及孝子劉子賢之為人君自是遠  
慕白沙而與子賢相友是年中鄉試十三名會試連黜

或諷以家貧宜就祿君曰士各有志也入太學試第一  
四方士及門者甚衆登弘治丙辰第三甲進士奉使廣  
東所司例欲舉贐君謝曰吾窮時嘗授徒兩臬司苟以  
媚道取之立可致贏豈待今日乎遂至白沙脩弟子禮  
問以誠敬理氣一切疑詞與義陳公亦為之傾盡且惓  
惓以靜一勉之選吉安府推官吉俗喜訟一詞所逮多  
至數百人往往有累死者君出令曰告者不出則詞不  
行逮者有干則至無則免不濫刑不久繫至誠懇惻人

不忍欺或時散遣則如期而至其時吉守張本以鋤強  
植弱為治然或失之疎君尤愼密民歌之曰要無冤對  
陳言有戴佩者迫於債負以田數畝託寺僧以養母詎  
人一馬逝去債主馬主各分其田君判曰戴佩既有存  
田養母之心必無竄身棄母之事且其母年高不可奪  
其所養民感服而止有方姓者娶妾方娠妻悍不能容  
逼嫁之果生男及父死歸嗣其業族人爭之君取其家  
女對驗之狀貌無異爭者始服有寡婦某氏豪家利其

有而誣訟之君斷令婦守志且為庇護其家其辨冤誣  
敦倫紀有出於法比之外者臺臣屢薦吏部考其政為  
天下第一召入為御史御史居法從多事矜飾君獨衣  
淡素借人一牝馬乘之恪慎共職務持風紀時大臣有  
縱子受賕言官交章劾之黃緣不去君申糾其罪遂致  
仕崔志端起道士遷為尚書君再疏論之言極剴切輒  
報罷君乃以母老乞終養或阻以貧君曰老母餘齡甘  
旨自給所不足者吾身耳吾奚恤遂歸所居無廳事增

構尋丈門卷蕭然田歲入甚薄養母外與家人共蔬食  
畜一蒼頭採薪給爨出則挾一傘自隨卧榻不備布帷  
器用桷樸或謂其身處膏澤不能自潤君曰視吾往日  
如何吾足矣吾足矣交際餽遺一毫不苟受授未嘗干  
人人亦無敢干之者自聞白沙靜一之訓盡日危坐斗  
室以靜觀天地萬物之運考古今聖賢之言行氣象以  
及古今治亂成敗之迹有契於心輒筆之於靜思錄錄  
多格言皆體驗身心而獨得者白沙卒與張廷實折東



往來論辨嘗語人曰儒者有向上功夫詩文土苴耳故  
謝絕不為間不得已酬應必據理立論不為漫語孝廟  
上賓繼以逆瑾擅政時事大異每得邸報憂憤不自勝  
時林見素亦家居密草一疏請誅瑾獨與君商議欲進  
求無一人可齎上相對飲泣而已未幾吏部廉君母老  
終養清苦自甘足稱孝廉奏改晉江縣學教諭用資祿  
以養親推文行以教人君具疏辭免御史舒晟福建左  
布政使陳珂連以孝廉薦吏部議照侍郎潘禮事例月

給食米制曰陳茂烈清苦可嘉著有司月給米三石以資孝養君又具疏辭制曰朝廷以孝治天下陳茂烈既家貧親老特給月米以資養贍不准辭君尤不自安欲再辭士大夫力止之乃受君自少飭勵晚年造養尤深靖恭端粹表裏無間其與人不為崖異見之者自然愧慕鄉國以為儀範風聲廣被遠方士有負笈而至者及是再被殊恩海內縉紳無不想聞其風采詩歌簡札頌美疊至君方日夜以母老乏嗣為憂太孺人年耄失其

常度極意承順躬調湯藥跬步不輟離歸寡妹以悅其  
心君連產八女僅一存見素曰吾子繼吾彭惠安也宜  
以女妻其孫輔遂以歸之晚產男顯星顯錫歡動城邑  
繼殤亡去年春君節縮月米之入手營墓域于城西之  
書林山去家二里許入夏得目青服涼劑過多氣益憊  
卧疾旬月適不幸太孺人棄世君強起號哭寢地疾益  
甚一日晨起對客語洋洋不亂飯至覺足痺就枕而逝  
正德丙子十二月十六日距生天順己卯六月二十三

日壽五十八卒之日天氣慘淡士類悲慟下至閭閻稚  
眊婦人女子亦為之咨嗟不能已鎮守內臣三司郡邑  
及隣封率奔走致賻奠蓋君平生不待蓋棺始定而獨  
悲其身後之寥落也先是君詣瑞安謁祖取族弟之子  
遠揚還莆教之至是見素命告先祠立遠揚為後凡殮  
具皆見素預為之余與方松厓助其殯役君平生尊事  
見素始終賴其力云以卒之明年丁丑正月六日奉太  
孺人及君君之前配贈孺人鄭氏窆焉虛其窆為今配

封孺人蔣氏副室俞林壽藏顯星顯錫別小寔於右方  
府衛列君事狀御史王君應鵬具以上聞詔賜坊牌表  
厥宅里附入鄉賢祠春秋致祭且量優給其家君官秩  
七品未應卹典此復殊恩也可謂始終哀榮矣遠揚持  
君手錄泣請予狀嗚呼知君莫如予也君之學識志行  
不容縷指而世以孝廉稱之特其大者耳故掇其大者  
書之擲筆推案潸然淚下友人山齋鄭岳撰

明詔授莆田縣儒學訓導貞孝劉君子賢行狀

劉氏世居城左君大父傳祖始徙黃石原道家焉傳祖  
生守宗晚未有息禱於仙夢語之曰孝哉閔子騫已而  
生君因以閔名君果以孝聞蓋亦異云君生有至性三  
歲喪父即能匍匐隨母朱孺人號泣孺人居貧守志遭  
君從子婿今黃長史英許紀善廷齊學通經典大義孺  
人每訓之曰自吾為而家婦聞爾祖以孝謹稱于鄉祖  
母李氏嘗刲股以療親疾爾父言之必流涕爾曹庸無  
效之乎君感奮自立遂絕意科舉之學求古聖賢裨身

訓家之法率而行之大書于堂曰片言忘孝非君子毫  
髮徇私是小人極力養母家雖貧甘毳必致定省溫清  
疾病不解帶母或恚怒則衣冠跪床下竟夕必得命乃  
起每痛父早喪不及養父及祖母二喪權厝他所以情  
事未伸遂斷酒肉遠房室訓徒隣邑朔望歸則號泣於  
殯所如是者三年里士鄭廷剛憐之與地族人貴仁助  
十金以葬歲時祭祀必齋沐虔率男婦奠獻一如家禮  
閨門嚴肅鄉人式焉嘗謂文公小學要在敬身張橫渠

教人必以禮為學基本在是故檢押尤慎繩行矩趨造  
次不苟流俗姍笑一不以屑意或疑其偽曰我非偽或  
病其迂曰我誠迂察之於幽而要之於久始大服賓於  
坐則衆為肅行於途則衆為起士大夫造其廬必脩容  
而後進私相語必曰子賢先生或呼為劉孝子云始司  
徒鄭公紀以史職在告延君入山中考論禮典歲致穀  
四十斛以資孝養提學周公孟中屢致餽羅公璟令郡  
守王侯弼貳守朱侯海建社學城中延君以教子弟迎




其母就養給閒田五十畝以充學費遇旱禱雨及丁祭齋宿輒以君俱王侯嘗曰對劉子賢使人躁妄自消其敬禮之如此未幾母卒號慟頓絕既葬廬于墓側三年衰經疏素哀毀骨立值烈風壞民舍君廬特完既辭學田環堵壁立饔飧或不繼終日欽欽危坐兒啼女號處之裕如也見素林公俊起留臺疏於朝曰劉閔恭慎純粹學行高古詞藻雖不逮其為人而德宇道風人自難及宜徵侍青宮講讀不報御史宗公葵按莆廉君貧甚

仍給以前所辭學田三十畝且疏薦之有孝友恭慎言行不苟之語吏部下所司覈實起用君力辭郡守陳侯效又薦君動遵古禮行著鄉曲孝親一念上通於天乞旌表錄用詔特授本府莆田縣儒學訓導以榮之自是海內名益重遠方士有及門質禮者廣信王郡守瑯遣人致幣圖其像以歸前後行部大吏率降拜鈞禮間致餽遺則以供母及葺先祠分給弟妹無餘伯母貧而寡迎養終身庶弟閩閭始合食弟婦有求異者君效繆彤

自撾晚歲口衆不能支始散就食配陳氏以失愛於母  
出之外家君時年三十二遂不別娶後以陳無依從二  
子迎歸終身不共寢食子長大繼次大齊俱娶于林大  
齊早卒女一適吳文薦孫男六自新自警自立自融自  
治自開皆質訥力田力書君生正統丁卯十月二十六  
日卯時至正德丙子年七十夏五月得病日亟問後事  
曰稱家可矣二十八日辰時命兒扶起端坐而瞑黃長  
史與地官體行為視殮訃聞士大夫咸嗟惋不置君號

艮軒所著有家禮考註昭穆圖說宗子法五倫啟蒙洪  
範九疇說孝經刊誤訂正鄉飲酒禮養正模範惟禮記  
類編未成書見素與陳如賓茂烈洎岳同往吊是冬如  
賓亦卒二君名行相次皆莆間氣而相繼淪謝古道其  
不可復矣悲夫見素既為達巡按胡公文靜出賻金率  
郡守馮侯馴縣令雷侯應龍為治墳以次年正月初二  
日丑時葬于谷清里西山之原且命余為狀而為之銘  
嗚呼君約身苦行敦尚倫紀上追古人張湛之矜嚴好

禮徐仲車之不忍加足于石元魯山不近女色君殆兼之矣漢獨行唐孝友俱有傳君之行固宜列之史官垂之不朽余故摭其事為狀以傳信焉



山齋文集卷十六

欽定四庫全書

集部

山齋文集卷

十七至  
二十四

詳校官監察御史<sub>臣</sub>龔驂文

中書<sub>臣</sub>劉源溥覆勘

總校官知縣<sub>臣</sub>楊懋珩

校對官助教<sub>臣</sub>卜維吉

謄錄監生<sub>臣</sub>戴璵

欽定四庫全書

山齋文集卷十七

明鄭岳撰

墓誌銘

明戶部郎中沿江陳士遠墓誌銘

戶部郎中陳君士遠諱騰鸞世居黃岡曾祖克讓徙江  
口故號沿江祖徽祚父允迪贈承德郎戶部主事母方  
氏贈安人生君兄弟五人君行敬五江口自勝國以來

人材絕少江海會流靈秀磅礴鬱積而始發於君生有異質書過目輒能牢記初治舉子業輒能脫凡格有奇語正德丙子舉試名第七梓其文庚辰會試辛巳廷試第二甲名第七授戶部主事監視芻餉出納不苛晉署員外郎中釐革壺獎務以利人嘉靖丁亥五月八日以病卒于京邸享年四十有八朝之公卿大夫士咸盡傷之君無他嗜好獨嗜書訂經質史旁及百家諸子奇辭隱帙靡不獵涉其為文沉鬱奧美至奇澁處殆不可句



其後耽翫左氏班馬漸趨古雅成一家言余起廢至京  
見素林公繼至咸以文委君余脩莆陽文獻君為沃擇  
惟精尚書九峰孫公鳳山秦公咸器其能使天假之年  
極所如往揆精振藻固當為吾莆增價顧奪之速何耶  
嘗讀賈誼鵬賦息夫躬絕命詞迺知古詞人多窮且不  
壽獨君哉其為人坦易言詞率直好面斥人過故多取  
忌毀然實無他腸遇事若草草而畧畛甚嚴如河西務  
九江權稅皆利權所在部堂亟委俱力辭卒之日囊無

粒金部長條知之為給二十金交游率致賻始克治木  
殮祔賣屋償責尚多逋負比觀歸家徒四壁嗚呼傷哉  
先娶鄭氏贈安人繼許氏封安人皆先卒側室徐氏子  
男四功劭皆衛庠生能紹家學勸劭女一孫男一峻功  
劭以貧故久不克葬茲卜地于待賓里東山之陽將以  
明年甲午正月初九日窆焉持郎中方世佩所述事狀  
拜且泣曰先子文學志操嘗辱公知不肖懼無以掩諸  
幽也願丐之志余曰浴江平生知友如王時行林以吉

郭直夫鄭啓範皆善文抑何取於老朽功劬曰固諸公  
意也余每危君之不克葬茲聞諸公助麥舟而二子極  
力圖之始克襄事又奚忍弗銘迺叙而銘之曰

孰豐厥稟孰杞厥成極其所至藝苑蜚英中道天閼孰  
究幽冥厥嗣烝烝尚克責于佳城

封太淑人林母方氏墓誌銘

太淑人方姓大父行人柳東公諱澥廉退執禮父和叔  
公由鄉薦為石城教諭卒無子太淑人生四歲而孤母

朱氏矢志鞠之性幼慧且習染家訓識度迥出女流柳東公特奇愛之曰是女不以與凡子林大姓且聞贈侍郎槐庭公少有異質遂以歸之林家無厚業太淑人躬執爨昧旦即起盥櫛與婢使雜作攻苦茹淡有恒情所不堪者槐庭公中年棄舉業陶情詩酒不問家有無公私百需咸於太淑人任之既舉一男四女男即兵部右侍郎富也娶張氏婦能共甘苦早棄世太淑人念之至今語必出涕繼娶翁娶柳及連歸諸女子士族而先畚

不損尺寸人咸難之侍郎始登第官評事忤逆瑾謫官  
又勒致仕阽危叵測大懼為太淑人戚顧怡然曰仕途  
利鈍非自我為之又奚尤瑾誅起廢歷郡守方面至今  
官太淑人不以為喜猶私治產親竈突侍郎跪請曰婦  
可代勞何自苦乃爾太淑人艷然曰爾林由吾曾太姑  
鄭安人辛苦立家至今數世食其利吾敢以驕惰遽墜  
其家法邪其素性嚴憚率類是家衆承事惟謹晚益降  
詞色為和婉婉道其貧時拮据狀且習見柳東公居家

禮法及門高第歷舉為諸孫及孫婦訓念石城公乏祀  
市祭田若干畝付方氏子孫掌之歲時燕會闔門千餘  
指女眷充溢堂奧太淑人頎然出其上舉止凝重衆視  
之若神凡受餉遺必厚謝村嫗以物售每翔以直且飲  
食之匱乏乞貸蠲惠無或恠疎戚貴賤屬心焉平生強  
健鮮疾晚得痰証每發昏憤疾已卽起飲啜如常嘉靖  
癸巳五月三日早起猶步履遍歷諸堂室飯至咽數口  
投箸而絕享年八十蓋收其全福云先是侍郎在兩廣

念母老懇懇連疏乞致仕歸養特旨落職歸未週歲而  
太淑人果卒足明不欺尋遇詔叙復卹典未下蓋有竢  
也太淑人以歲辛卯覃恩加封號孫萬仞例得蔭叙入  
太學曾孫兆金登鄉舉今歲甲午孫萬潮繼登萬峰兆  
恩俱錄學籍萬峰而下萬殊萬言凡五孫兆恩而下兆  
居兆憲兆誥兆禎兆麟凡七曾孫孫女二曾孫女四玄  
孫女二孫曾諸婦俱出官門其福澤流衍將百世賴之  
寧獨哀榮無憾已哉槐庭公先葬石門將合葬啓封弗

利迺改兆于右以是年十二月二十二日合二柩窆焉  
以萬潮壻于我具狀丐銘迺叙而銘之曰

鍾之異維家之祥胤之良維國之光振振來昆世永昌持  
盈萃祉莫與京吁嗟女士兮今則亡石門改兆兮雙玉偕藏  
明贈承德郎刑部廣東清吏司主事質菴王君

墓誌銘

王世居沙堤稱著姓元季有諱發者遭兵燹蕩析隨  
母吳依舅氏耕原以居遂冒吳姓歷五世至御史公諱



王榮暨今知府鳳靈皆以吳著仕籍鳳靈為刑部主事  
始奏復王姓今為耕原王氏君諱瑄字玉和號質菴御  
史季弟鳳靈父也厥考諱止敬以御史初官太常博士  
贈博士母林氏封太孺人質菴少從御史治舉子業通  
大義以考博士蚤逝伯兄王伯挾貲遊湖湘十餘年不  
返家遂落口衆食寡公私百責藁萎竭力營治拮据撐  
拄以衣食內外婚嫁其子女以母貽太孺人憂俾御史  
得以專志於學及舉進士官轍往來煩費質菴皆密為

之備俾得蠲志于官又念太孺人思伯不置迺裹足走  
湖湘間闕三年竟迎伯以歸視時貿稍積贏餘則以脩  
葺先世祠墓置塾延師以教諸子姓中年太孺人憫其  
勞悴命兄弟分異均給所遺田宅且聽各私其有質菴  
獨不肯私既異二年兄弟有欲得腴田者慨然易之御  
史欲廣宅割所分屋數楹與之伯氏子失愛見逐并其  
妻孥畜之皆近世所難者自御史顯宦未嘗藉聲勢取  
潤於官較轢其鄉人聞人善稱慕不置而惠卹其貧嘗

有所親貸白金二十兩持去旋歸告曰適所貸者喪之  
途矣質菴曰旣喪之途將若之何竟不復索晚舉七丈  
夫子鳳靈最末少始生以星厯卜之曰是兒必貴質菴  
以正德己巳二月二十六日卒越八年丙子鳳靈與兄  
鳳儀同舉鄉薦明年鳳靈舉進士歷部屬出守襄陽年  
纔三十文才吏幹表出流輩余每私異之及得吾宗彥  
提學御史洛書所為質菴行狀迺嘆曰是固有自哉夫  
嗇於身而發於其子天之道終定如是爲善者其勸爾

矣鳳靈以主事遇恩例贈質菴如其官母林氏安人封  
生母戴氏太安人其諸兄鳳翔鳳遠鳳偁鳳儼皆早世  
鳳儀為亳州學正亦卒今在惟鳳澤聽選官孫男大受  
衛庠生大勲一貫邑庠生大節凡五房之寡幼衣食婚  
喪皆鳳靈乎賴其家又素貧既得襄陽奉母戴就養逾  
年卒歸圖葬事卜祔質菴墓不吉卜遷吉乃別治三壙  
于報恩山之原博士公墓右以嘉靖戊子十二月十七  
日啓質菴林母墓遷二柩與戴合窆質菴先葬未有銘

今宜銘銘曰

孝弟于人兮道在邇競利傷恩兮俗頽靡幹蠱用譽兮因  
心則友世若質菴兮其庶矣葆光弗耀兮多委祉惟天祐善  
兮篤生令子覃恩未艾兮賁九泉改葬勒銘兮徵于野史  
明中憲大夫雲南按察司副使蘭臯陳公墓誌  
銘

嘉靖乙酉余謝事歸蘭臯陳公亟枉顧語甚臞余故居  
蒲坂去公錦墩纔二里許余方開渠築室公辱相其成

操舟往來相樂也越二年丁亥正月二十四日公遽微疾卒余匍匐往吊悲嘅疇昔失此老友蓋公年長余同舉鄉薦仕宦出入同時交莫逆也公初計偕中禮部乙榜為直隸獻縣儒學教諭其地材素乏乃嚴立條教以身率之拔其穎異加課督焉由是科第繼起郡長貳皆遣子就學待以賓禮六載例得會試登弘治己未進士授直隸南樂知縣先時歲荒民流公為招徠立券貸溫戶種子令民耕作二年亡者悉歸與民示信竊盜獲者

穴狗竇出入且許親屬保領能改惡即復其常由是人  
恥為盜雖遺物於道亦不敢私歲辛酉郡雨雹壬戌郡  
蝗緣南樂獨免巡按御史遣官覈實條其政蹟殊異上  
旌癸亥徵入百姓遮留解其鞶懸置于樓立名宦祠昉  
於公也由戶部主事轉刑部員外郎郎中時逆璫擅威  
柄邏者獲巨盜獄具欲以賂釋公持不可以直被逮幾  
不免正德庚午陞山西布政司左參議旬宣所至繩治  
強梗王府侵冒民田事下推勘奪歸之民撫按交章論

薦乙亥轉雲南按察司副使鋤剔奸蠹憲度脩明嘗掌提學道事考較惟允然嚴於嫉惡卒不免於不悅已者之中傷庚辰始解官歸歸八年卒年七十三矣公軀貌豐偉顧盼有威卽之則樂易款密性簡重充於學識居官絕機穽巧媚以養交倖進居家不問生產性耽書至老不倦詩文沉鬱有味隱然為鄉之望焉配封宜人張氏相安儉素教子孫有法撫孤姪而婚配之在南樂民有獲窖錢者爭輸之官宜人曰天以賜民官何利焉卒



畀之民先公五年卒壽七十子男二長肅先卒次懿女  
二長適李長史仁之子一復次適許長史仁之子淳孫  
相懿以下俱弟子員曾孫玄錫師錫陳居錦墩族久以  
蕃讀書登第則自公之兄翰林庶吉士邦瑞公始其治  
尚書有師法一時學者宗之公與從父兄浙江布政使  
公仁俱從受業聯舉進士一門稱盛曾祖孟岳祖從吉  
考贈刑部員外郎諱克嗣妣俞氏贈宜人以公貴也公  
諱邦器字五器別其號蘭皋云公嘗於白杜嶺祖墳之

後手營新墳，配張宜人矣。懿卜以今年戊子十二月十五日壬午奉公窆焉。以御史朱君必東狀請銘，誼不得辭，乃叙而銘之。銘曰：

于嗟蘭皋，修云徂壺。公木蘭跡已孤，宦轍所至有美譽。菟裘歸老，無厚儲杜門，却掃日劬書。後生考德，式其廬。老成典刑，日以疎我。銘其墓語，非諛。

明淮府左長史進階中憲大夫真白林公暨淑配封宜人吳氏墓誌銘

弘治初間莆儒碩官于國子者數人若監丞林公子道  
學正陳公子佩暨吾中表兄林公世祥皆以宿學古行  
表律後進一時太學稱盛余脩莆陽文獻畧已敘述茲  
林公之葬也孫森等具狀請銘於余前輩典刑公不可  
作矣公諱稔既入官以祥名林其先有宋進士諱龍者  
卜居黃石琳井孫壽者遷書街公今徙玉塘曾祖仲頤  
公祖原脩公皆邑庠造士也考諱亮贈奉政大夫妣宋  
氏司諫雍公女考蚤卒舅奪母志公幼有志識泣不從

遂依叔氏以居稍長勵志力學登成化乙酉鄉薦己丑  
中乙榜拜博羅學諭日與諸生相講解真意懇懃視諸  
生如子諸生亦父視之出其刑範若張都憲律曾侍御祿  
終身佩服弗忘歷九載部使者交薦諸生請留不可迺  
相與立生祠于學宮題其柱曰先生真白日後學仰清  
風因更號真白云吏部試優等例得遷有司公懇辭太  
宰尹公面嘆其高資轉江西饒州教授其教如博邑諸  
生脩脯有無厚薄卒不以介意而賙貧助喪義無所靳

九載考績諸生就學宮立去思碑淮康王親為製文刻  
之遷國子助教六館生多從講業天部書考行淑教勤  
超擢淮府左長史實異格也淮康王素重其賢虛心倚  
毗時內臣有跋扈者公劾罪之康王薨世子未立朝廷  
勅公輔攝處分國事羣小譸張奏許公鎮以靜卒以無  
事嗣王具奏輔導勤勞蒙特恩進階中憲大夫錫以誥  
詞曰輔相盡匡持之力講經多啓沃之功追贈厥考奉  
政大夫淮府左長史封淑配宜人吳氏公尋以老乞歸

所居闕闔日靜坐一室人莫窺其面吉月歲節一謁宗祠會族衆而已竟不跡城府蓋公寡嗜欲薄世味敦慎好禮在官所五鼓必興盛暑不廢冠裳人未嘗見其科頭晏起者痛父早卒念叔氏撫教恩事之如父先世所遺業惟聽叔命分置以俸資上七品散官為叔榮既而謂母子無絕道拘於制不得伸而猶曲致其孝焉諸伯叔兄弟不能葬者十二喪悉出資為助葬墓在穀城之麓施及姻舊咸恩之余昔為湖廣僉憲奉吾母祿養道

經饒郡公懇留暫住藩署數日且曰吾幼時受愛於姑  
今俱老矣語必稱名進酒必長跪召一鍛工以銀器將  
以致贈為工者侵盜幾半僕與之究競公聞之以雞米  
遺工去戒其僕曰若既露其惡誰復任之是絕其藝矣  
余目擊其事為之嘆息其存心誠厚類是生平於人無  
忿競不口人過或有欺侮者亦不之較有古君子長者  
風焉所治經學甚醇嘗同考順天主考浙江多得士吳  
宜人與公相敬如賓公樂客遇至輒留宜人常洗腆以

俟其慈祥好施悉先公意為之卒之日簪珥衣被俱散  
之盡其在淮藩也宮中姬嬪尊為女師郡主笄及下嫁  
必請宜人掌行其禮子一諱繼善字乾卿邑庠生抱負  
甚偉以宿疾不竟所志惜哉娶陳大尹則孔女善治家  
勤婦道公以正德乙亥十二月二十日卒享年七十有  
七嘉靖壬午歲乾卿與陳氏婦繼卒獨宜人壽最高享  
年九十嘉靖丁亥九月十六日以疾卒女三長適吳外  
翰孜之子伯和次適李大尹元之子子齊三適贈主事



黃守居之子待遂孫男三孟森郡庠生娶楊教授文命  
女仲彬邑庠生娶黃大尹汝顯女季一栻郡庠生娶周  
大尹澄女曾孫三爚燧燦墓在安樂里嶺前卜以今年  
丙申正月十七日奉柩厝焉並乾鄉陳氏婦以從之銘  
曰

大樸既散淳風日漓反琢以真典刑在茲古貌古心動  
不踰禮歷教兩庠入助國學不二其德師道不孤人曰  
醇儒式是模範迨相皇藩請共朝夕主少國疑橫流屹

立帝念勞勩錫以金緋令德保終請老以歸溫溫宜人  
克相內治婉德孕賢聿稱女士葫嶺之原有封若堂爰及  
子婦二世偕藏揚德揚休用垂無極慨比有道庶無媿色

雷母鄭孺人墓誌銘

嘉靖十五年四月初七日吾郡推古和雷侯禮母孺人  
鄭氏卒于官邸莆諸生素受侯教合如千人助其喪役  
凡殮襚悉用布無繒綺之飾諸生出以語余嘆曰昔寇  
萊公為樞密直學士賞賜金帛盈積其乳母曰太夫人

不幸時家貧求一帛以為襚不可得詎知有今日萊公  
聞之大慟其事殆與今類余於是善侯守官貧且知孺  
人之能安於貧也既數日侯令諸生持林郎中志道所  
述行狀請銘於序余尚恐弗銘乎哉按狀豐城之雷始  
於令煥其事具載張華博物志煥既得劍名曾孫曰鐔  
志瑞也自晉傳緒久益熾至延平郡守誠智生啓陽啓  
陽生遂冲娶揭氏是生邦鑑號強恕齋者禮父也始邦  
鑑卜婚鄭氏本南巷右族處士統女自年十三時母陳

病劇每夕稽顙北辰請以身代因茹素三年祈母壽其  
幼性如是既歸于雷事揭氏姑盡誠孝姑嘗病孺人  
扶抱滌穢衣不解帶連數夕為常姑賴以無苦一日聞  
寇至衆皆逸孺人獨守姑不忍離既舉瑚璉又感異夢  
舉禮方在襁抱叔氏子祐裔幼孤孺人均乳之至湮竭  
寧以餅啖禮以是祐裔咸母孺人強恕翁少業儒再試  
弗遇遨遊湖湘間孺人獨攻苦茹淡以娶瑚婦丁璉婦  
揭而歸女于劉廷獻黃澥又為禮聘李氏誠曰待汝學

成名迺娶戊子禮果登鄉薦卒業南雍孺人揭李氏婦  
就婚未幾李卒壬辰禮登進士孺人為續娶張氏婦與  
俱迨節推命下遂偕之官居無何強恕齋亦來就養敬  
相待如賓相安澹泊期勉率厥子成遠業侯每出輒為  
扁重門絕不與外人接旦夕以省刑洗冤為訓侯奉以  
周旋惟謹持法詳平接士夫質愿不欺暇即與諸生講  
解經義翁與孺人聞而樂之侯每承檄理劇于他郡在  
省城聞母病歸視未決旬遂卒享年六十八澄清濠元

寶其孫也孺人自至官邸常嬰疾雖困牀褥一錢寸縷  
猶手自檢制蓋務儉以助廉云郡人咸誦母賢而又惜  
侯去也余忍弗銘銘曰

古有崔母官無贏資稱好消息亦有雋母獄無枉詞喜  
進飲食吁嗟孺人式克似之壺儀秩秩守官廉平祿養  
未豐大故奄及郡人哀之誄以銘辭式垂無極

山齋文集卷十七

欽定四庫全書

山齋文集卷十八

明 鄭岳 撰

墓誌銘

明奉議大夫山東按察司僉事穀齋林公墓誌  
銘

莆世族稱姑青林氏宋有回年公者嗜義樂施嘗勗紅  
泉義學延族子艾軒講授伊洛之學四方學徒至者咸

館穀之平居積陰澤以惠利人人至于今子孫獨盛其  
錫類象賢若穀齊者迺其十二世孫也諱典字汝淳行  
純五曾大父稔贈會州衛經歷大父穀累官揚州府同  
知進階朝列大夫父憲領鄉薦為秀水訓導母黃氏生  
母姚氏產公于秀庠長娶參政黃公譽女林與黃世授  
業壁經至公尤精舉成化丁酉鄉薦名第十梓其文甲  
辰會試乙榜授冠縣教諭丁母黃氏憂服除改西安教  
諭其地材素乏公嚴立條教日與諸生講解風雨寒暑



不少輟自是科目繼起提學吳公伯通稱為浙師儒第  
一司寇彭惠安公每舉為司教者式兩京廣西連聘校  
文所至稱得人擢鄖陽府學教授鄖陽新設郡治材尤  
乏公擇其年少質敏者悉令改經親為講解如西安時  
贄儀盡卻或捐俸以資其貧士習為變有曾得祿者遂  
以書經魁湖省連登甲第而人文漸闢矣主考廣藩謁  
陳白沙張東所廷實亦來會談論理粵累日迺別白沙  
喜謂人曰自吾與莆人友惟林汝惇天資近道可遠到

也撫治都御史陳公清薦為宜城知縣宜城縣小當孔道公儒者素未臨民或難之至則百廢俱舉若素習於吏然治為諸邑最撫巡藩臬交薦擢順天府通判三載書稱最得推恩贈父如已官母黃贈安人姚封太安人配黃安人尋擢都察院經歷各道御史爭圖便差公持資序不曲副多致憾嫉踰年轉中軍都督府經歷遂擢廣西按察司僉事甫蒞任聞姚太安人訃服除改山東奉勅提督北直隸屯田兼管糧草嚴限督徵京畿事涉

權貴不少假疏乞休不許正德庚辰吏部以年及例與致仕又五年為嘉靖乙酉壽滿七十六月二十日以疾卒遠近聞而悲之蓋公敷歷中外幾四十年於先世田廬未嘗增拓既致仕家居隘甚屋西稍葺數椽曰西翠小堂日坐其中稽經訂史罕與人接於世故紛華泊如也充養內腴貌溫而言確詩文清雋近時鄉名輩有古意可範俗者如公邈不可得已悲夫子應文郡庠生側室朱出娶吳孫永熙永燾永鰲女長適黃刑部文器之

子瀛次適黃僉憲世英之子國子生觀次適方貳守恒謙之子鄉進士從鯤俱黃安人出又次適方方伯文玉之子國子生直側室梁出瀛從鯤俱天二女守節無玷蓋得之家教云黃安人先卒葬于楊山至是應文卜以嘉靖丁亥十二月二十九日未時奉公柩合窆先期具事狀請銘予曰公與素翁同宗且受知最深是銘宜翁為之曰翁病辭以屬公亦先君意也迺序而銘之曰

視官之能徵厥施視官之守徵厥遺始職一校陟臬司歷

官三紀守故菑瑩然渾璞絕瑕疵聿求古人其庶幾我  
銘其藏無愧辭

明前文林郎潮陽縣知縣友泉宋公墓誌銘

宋氏自節推諱銑者自晉江徙居莆之後埭族久以大  
國朝沐陽訓導公諱勸國子助教贈禮部主事公諱汝  
勤仍父子儒職以學行稱主事生立齋公諱端儀博極  
羣籍遠尋程朱遺緒究其指歸作考亭淵源錄其他著  
述尚多海內推為碩儒官終廣東提學僉事廣人祀于

仰高祠是為公父妣封安人黃氏慈而能訓故公德器夙成弘治乙卯鄉試名第一卒業太學銓授廣東潮陽縣知縣潮俗豐侈大姓喜武斷持陰罪相構陷公至朔望矢于神絕苞苴請托開諭以至誠解仇修睦小大成懷往時民糧差役偏重公總一邑丁糧通融均派民得以紓凡可以省費裕民者悉心為之而尤汲汲於正風俗造就人才會兩科供事場屋多所薦達因而成名者甚衆有鄉宦陳洸者橫甚因請托不行叩公喉監司羅

織以重罪指使劇賊曾鉅頭誣以贓賊終不忍加汚民  
有李戴琥連氏者甘受撻死以直公寬故其事卒得白公  
久繫無聊嘗作訴冤錄會沈居言路肆排善類搖國是  
臺臣有得公訴冤錄者封以上聞詔遣官往訊得其實  
沈寅緣奏辯逮公下詔獄廷鞠沈所奏公事無一驗竟  
奪職為民初公去潮赴廣民奔走省下者百千人致薪  
米以調其乏公再經潮民湏洞出迎爭致金幣為贈却  
不受迺合所却金建生祠于北衢聯石為巨碑以翰林

編修王君思時謫官鄰封知其詳屬為之記里巷刻小碑以十數又於東山宮石大刻清慎仁愛宋公去思洸惡之毀祠與碑洸死衆復脩祠重刻碑時節致水土物候問生慶死賻雖古循吏不能過然公亦坐是忤豪右荐罹大禍瀕九死不悔方被逮時所親送至郊環泣公慷慨言曰聖明在上生還有日何遽生哭人為也一笑而別來逮者錦衣衛千戶常忠廉公居官貧絲毫無所取且善視之許其子曰敏從當是時權勢赫焰禍叵測



卒賴公議扶持不然身家俱碎矣公既幸脫禍時與鄉耆舊林翁孚可輩為逸老會取樂山水間其於世故泊如也家雖世宦無厚蓄訓導助教祠田薄公割私田以助構專祠以祀立齋且倡脩大宗祠割地租以充祠費脩始祖節推評事公墓而并及先世諸墓割租田以祭蓋悉心致孝於其先而施及姻族舊故率厚無薄其所遺於諸子者衣食僅僅而已立齋公在廣得士心其門徒繼宦吾閩公絕不干以私嘗曰低首下心為兒孫計

吾恥之其宅心靜定言有物而行有恒庶幾前輩之風  
焉名嵩字元翰以字行更字良翰號友泉配黃氏行人  
司副乾亨公女端靜善持家側室林氏陳氏凡三男四  
女長曰敏郡庠生娶林長史希瑩女繼娶林次曰徵娶  
黃主事文器孫女次曰敦娶林貳守克容女先卒女長  
適方鄉貢思久之孫惟忠次適余子詹事府錄事泓次  
適方尚書簡肅之孫郡庠生夢升次適吳憲副約中之  
孫紹宗孫男四人大勗大昌大景大巨女六人嘉靖丙

申公年七十一矣秋間忽遘疾八月初三日卒於乎傷  
哉公嘗於文賦里梅庵山營治二壙至是曰敏結砌完  
固卜以今年己亥正月四日奉公窆焉虛其左為黃氏  
壽藏同社友林翁以永述行狀余姻且友也為之銘曰  
惟宋家學世儼河汾衍及立齋益廓有聞公受型範德  
器融渾首解省闈卒業成均柄授則優薄試一邑式徵  
往轍矢心舉職爬梳宿垢狂狡帖息撫摩以仁大小悅  
懌憐人弗利巧事羅織百折艱屯終觀天日祠毀載飾

碑毀載立惟潮於公永垂血食考德論世我銘斯石

中憲大夫四川按察司副使吳公墓誌銘

嘉靖十二年臨淵吳公年七十矣公素彊健脩邁疾彌  
留亟召諸會友屬處分後事少間作詩訣別其落句云  
而今採藥武夷去流水桃花春鳥聲又詩別其弟取殮  
衣閱之凡喪葬事皆預授意以行十一月朔日遂卒嗚  
呼死生大變也公處之超脫不亂如其素所造養足  
徵矣公諱希由字約中號臨淵唐莆田知錄公良之後

世居可塘後徙泄口俗仍舊名墓堯實泄口云公自其  
少時從鄭司訓體健學于城中愛其名物爰自蜀歸遂  
卜居城右然泄口族黨在焉迺與二弟希瞻希平恢拓  
舊宅往來居之示無忘也始由弘治己未進士授南京  
刑部主事決滯摘伏有聲丁內艱服除擢署員外郎尋  
晉郎中聲績益振出僉浙江按察司事後改提督兩浙  
及南直隸蘇松等處水利屯田兼督捕盜賊前後凡三  
奉璽書以行職務繁劇矢殫勞動濬淤築隄化荒為沃

民相率立石紀績都憲俞公特奏旌之復屯田舊額而釐其宿蠹會劉賊渡江公以兵屬總制陸公卒成擒擢四川按察司副使備兵威茂其地犬牙番夷時扼險肆掠為患公至宣布威信增堡峙糧謹其間諜番不敢犯會巡撫馬公用兵征勦竟以道險失利凡有事于軍者皆逮罪公以不乏軍興獲免然公歷事兩朝宦情已厭適巡按有與公不協者遂上疏致仕而歸巡撫許公移書留之不可僚吏有持金追贖者公矢之曰予所受若

贖者覆予舟其人慚而退既抵家杜門養望與林翠庭  
暨余數人為逸老會凡莆山川諸名勝處遊迹殆遍繪  
圖賦詩詎今六七載而公遽溘然先逝矣於戲悲夫曾  
祖中允祖光禮父文英贈承德郎南京刑部主事後以  
僉事階加贈奉政大夫母劉氏封太安人贈宜人公未  
冠而奉政公卒撫教二弟甚恩而二弟卒賴以有立脩  
祖墓增祭田葬族之不能葬者十喪姻族故舊授館給  
祭遇旱捐粟濟饑朱郡守衮書公名于義芳亭以示勸

遇人曲盡忱款不虞人欺余嘗戲謂公某嘗給公以某  
事某事信有諸公咲曰吾未嘗欺人而人每欺予何邪  
其渾涵之量長厚之風篤實之操猶不失前輩風度而  
今不可作矣娶陳氏封宜人教諭徵叙女子長綾舉鄉  
試娶余繼林俱先卒次紳亦舉鄉試娶方布政介卿女  
綾無子公曰大宗不可絕也迺擇從姪之子紹宗後綾  
割家產之半與之無少顧靳是亦常情所難紹宗娶宋  
大尹良翰女女三長適鄭教諭貴貞之子珊次適翁少



參世用之孫格次適黃郡守弼甫之子曰孜孫男三策  
三聘公嘗手營墓域于澹頭山之麓啟封不吉紳等復  
改卜焉己亥始葬于城南之鳳山謀以十一月初九日  
奉公柩窆焉先期奉其族袞光祿卿紹曾氏狀請銘嗚  
呼是尚忍弗銘乎哉銘曰

叔風斯頽亡羊者岐琢雕返朴典型在茲渚流成淵既  
沛厥施揚颺激石斂而寂而結壽俊兮娛風熙溍朝露  
今日已晞翳考德于千祀兮劖此珉詞

明封承德郎戶部主事長樂鄭君墓誌銘

鄭本姬姓五季初有諱攝者自河南光州入閩居長樂  
長樂之有鄭始此傳十七世至封君諱明允字孔信以  
字行別號海峰其曾大父棟大父永昭父伯容妣任氏  
任之喪封君方九齡哀毀如成人稍長與兄州守孔明  
並治舉子業名寢寢屈其流輩已而以父老輟業幹蠱  
俾兄得顯學州守領鄉薦語人曰弟實任勞成我父疾  
亟封君憂惶嘗糞祈代歿哀毀幾絕其教諸兒慎擇師

凡登降拜揖糞灑下及几研髮襦之彙皆斬斬授以成  
法見者不問知其為某家子族子姓肅肅稟進止歲時  
聚會為誦先世遺事疊疊不忘孤嫠無疎近度力賑給  
於窶喪亦然與鄉人期云云即非已所便必力副曰無  
失然諾也性喜賓客雅為賢達器重大司空林公廷選  
少參王公有恬皆稱老友鄭少谷善夫亦曰見海峰使  
人檢過不暇上虞潘君府尹長樂日就封君諮所以振  
舉風教者行之賓之鄉飲屢不赴其行誼孚於人如是

配卓氏贈安人先七年卒繼林氏子男三長慶領鄉薦  
次寅邑庠生卒季憲舉進士授戶部主事值恩例封如  
其官憲今改刑部女二適陳某陳某孫男二諱邑庠生  
易孫女二封君生天順戊寅卒以嘉靖乙酉正月二十  
二日視生期先一日享年六十八墓在石龜山之下卓  
安人葬焉憲聞訃奔歸卜將以君合窆持倫太史以訓  
所述事狀泣而乞余銘余素昧君而識憲也沉粹力學  
歷二部有稱可以知遺教矣是宜銘銘曰

坎為澤以時施家是範鄉是儀維子之遺寵光日遠典  
刑在茲烏虜石龜盤鬱兮塚累累揭此銘章兮永厥垂

明文林郎直隸威縣知縣西軒林君墓誌銘

往歲予謝事歸進謁母家館于中表弟西軒所其時水  
南士夫仕而休者至十數人日延緣讌集以為樂屈指  
未十年嚮所與遊者淪謝殆盡而西軒以歲嘉靖壬辰  
四月十七日卒自是予水南之跡遂疎時一興慨焉今  
年乙未西軒之子泓將圖葬事泣請銘於予予尚恐銘

吾西軒也哉西軒諱嵩字朝高姓林氏吾母淑人從姪  
也曾祖季禮祖原時父學勤母姑青朱氏早卒學勤公  
質直拙治生晚年家益貧西軒稍長知無世業足恃遂  
苦志力學晝吟夜誦矻矻不少休以儒士就府縣試提  
學試輒首其列科場屢躋正德庚午始以詩經中鄉試  
第十三名林氏自宋進士諱龍者始居水南之琳井後  
遷書街稱詩禮舊家至長史世祥公始登賢書以學行  
聞于時至是西軒繼捷門戶益以振筮仕武强教諭待

諸生樂易勤於訓迪隣邑聞其經學不遠鼓篋來從多  
所成就將九載陞廣平府威縣知縣威雖隸畿輔然簡  
僻頗易治西軒才優為之賦登訟理為畿縣最按部之  
使喜苛密西軒度不能曲意取容遂解組歸時水南書  
院新成西軒卜居院旁而與前十數人者朔望為會登  
降周旋衣冠濟楚而西軒姿貌偉特豐下美髯髭風神  
開朗遇事迎解人亦樂與之親於居後闕一室昭閭淨  
爽移度花石日邀賓朋為娛老計居無何而大故及之

年僅六十人咸為之惜云配孺人戴氏先卒男深濡俱夭泓邑庠生娶楊長史國本女淮側室陳氏出議吳知縣洲女西軒先治墳于湖嶺葬厥父母既又改葬二親于今湖嶺之前以配戴氏男濡祔於左矣茲西軒當祔右卜以是冬十二月二十八日窆焉虛一窀為側室曹氏壽藏為之銘曰

既揭而起復從而圯孰握其機而張而弛窮沕穆而莫測具造化之終始嶺前卜兆川流山峙慶澤孔延式徵茲紀



明奉議大夫廣西桂林府同知致仕澄溪黃君墓誌銘

澄溪黃君濂甫既謝桂林同知府事歸涵江間以事入城府輒偕張大尹文相枉顧余南郭草堂余或遊郡北諸山二君必持榼留款往來相好也比余起廢道出涵江辱祖餞及歸復迂于忠烈之祠其時覺澄溪貌稍衰神采異昔心訝之又二年君以疾卒時嘉靖六年丁亥八月二日也享年六十有九其子茶陵州判官桂華奔

計歸聿圖襄事介姻友國子監丞西洲林子石謁余請  
銘余以老弗任筆硯再辭桂華曰先子遺命必欲得公  
銘以葬西洲曰公不忘舊好幸惠邀而銘之以姚郎中  
蒙齋在養所為行狀進按狀君諱守濂字濂甫因號澄  
溪其世居涵江唐崇文館校書璞公之裔曾祖孟舉祖  
孚仲考恒仁俱以隱德世其家至君始以書經中弘治  
壬子鄉試第十二名明年禮部會試乙榜授六安州訓  
導嚴課諸生日與講解風雪弗少廢以績登擢知睢寧

縣值淮北荐饑多方賑貸人多得全活宿徐二州漕涸  
舟膠撫臣委君疏導君嘆曰是豈人力所能濟哉乃籲  
天夜禱雨大注舟行無滯役夫歡呼解散榮府之國道  
邳撫按以邳守弗任委君供應百需取辦無缺以能擢  
橫州知州橫當孔道民夷雜處漢土官兵征調及安南  
貢使往來旁午隨宜接應民不告擾脩橫誌列于名宦  
再轉桂林府同知隸省下尤任冗劇巡按有不悅君者  
君嘆曰古人謂三宜去吾可不見幾乎遂告致仕歸脫

然無繫恡意君諳委世故與人交有禮而識鑒尤精雕  
素乏材君擇其穎異力加振作遂有高瑁者登第為雕  
破荒廣西文場以外簾閱一卷曰是宜為解首及拆卷  
乃屠楷也果協士論居鄉泛愛嚮往名達先輩陳公繼  
之以死難無後率衆白之郡改龍津社為忠烈祠以祀  
朱郡守以聖妃宮為壽澤書院君力贊其後皆為風教  
之助兄之子桂芳桂林幼孤收恤如子遺命桂芳割田  
租五十石房一區與之桂華及弟靖江王府典膳桂秀

女適李道泰者俱元配顧氏出桂叢女適陳萃賢者繼  
室趙氏出孫男三須因須一須奮女四曾孫男女各一  
墓在興教里西庵山允三竈君葬中左顧右為趙壽藏  
葬年月日為嘉靖八年己丑十二月廿有二日銘曰

粵維涵江薄海一厘士多業儒以進取類或偃蹇以弗宣  
吁嗟澄溪既貴且壽厥世孔延豈所畜者宏不因俗以  
遷故獨享其全徵信後人我銘斯阡

山齋文集卷十八

欽定四庫全書

山齋文集卷十九

明 鄭岳 撰

墓表

處士張君墓表

嘉靖五年丙戌二月二日南坡處士張君惟正卒于家  
其冢子文鎬方試南宮中式越三月廷試第進士試都  
察院政五月十七日始聞訃匍匐就道哀毀幾絕既抵

家亟圖葬事卜以是冬十二月十二日窆焉其墓在縣北五里許其地即君所取號曰南坡者君嘗手營其麓葬其配陳氏茲君之葬也文鎬請于方都憲松厓銘之顧未有表碣復於余請泣且言曰二公鄉之望也吾先君得惠懷以垂不朽不肖孤亦得以少追罪責余謝不可迺受狀而讀之君諱基字惟正世居縣郭蜚鳳山下鄉人稱曰縣張蓋仙之著姓也肇居于唐招討副使公濬入國朝有諱錄者為儀禮序班諱洪者國子上舍君



之高曾王父也祖琳早卒祖母王氏以貞節旌于門父  
炯號水月母周氏生君兄弟三人君其季也家故裕至  
水月時詘舉羸卒之日舊產多棄而取貸者蝟集母孺  
人深以為憂君跪曰是母庸慮兒能任之迺棄舉業治  
家政綜理節縮動有矩法以嚴御家衆不憚勤瘁久之  
家漸振棄者復而貸者酬操其餘以拓居第以新祠宇  
舉三世之喪而安厝之不令二兄均任其費正德己卯  
寇入縣居第蕩焚君又獨出貲完構而文鎬適以是秋

舉鄉薦人以君積孝義宜受其報晚得末疾謝人事於屋西構祠置祭田於南坡置墓田凡為燕翼謀者莫不備舉庶吉士林汝雨所述行狀謂君能光前裕後信不誣矣況有子文鎬駸駸嚮用其顯揚於他日者固未艾也文鎬二弟文鎡著錄邑庠文鎡方就學皆秀發五女皆嫁士族孫學澄學浩其詳具墓誌余惟剝而復蠱極當治天道與人事每每相乘若張之中微賴君復振所謂幹蠱用譽碩果不食者徵之今尤信余故表其事以

為世式

明旌表孝廉文林郎雲南道監察御史如賓陳先  
生墓表

先生諱茂烈字時周浙之瑞安人曾祖伯洪功授興化  
衛總旗世其籍先生少孤且貧親負土葬父事祖母及  
母曲盡誠愛既得祿迎養母母益老棄而歸養人謂之  
孝舉進士節推吉安入為御史盡瘁舉職有水蘗聲廬  
舍服食如寒畯人謂之廉始治舉業即慕古顏曾氏為

省克錄書所獨得者為靜思錄又嘗面受陳公甫靜一之訓玩心淵微動不渝禮世稱孝廉殆未足以盡之天子聞其賢食以晉江學祿辭特給月米以資孝養辭不獲始受及卒表厥宅里祠鄉賢優給其家蓋異數也年五十八無子以族子遠揚後既葬方伯伍公符郡守馮侯馴郡丞李侯縉節推傅侯朝縣尹雷侯應龍立石表墓其友山齋鄭岳括狀中語劄之使觀者式焉

山齋文集卷十九

欽定四庫全書

山齋文集卷二十

明 鄭岳 撰

贊

頤晦像述贊

頤晦林子汝儀系出唐九牧端州刺史常公二十三世  
孫中都留守司經歷古惇公季子也卜居于小西湖曲  
環植花竹構亭臨池上日操琴賦詩悠如也旣又曰是

未能遠去塵囂迺為溪閣于木蘭北渠古樹輪囷奇石磊砢開軒臨流日操琴賦詩悠如也稽經訂史旁引百家衆流於古今理亂人情物理之得失輿圖山川形勝無不究竟而各適於用旣又曰是未能去智離形而累於物也迺危坐一龕取子朱子讀書錄中調息箴及諸道書而讀之以脩精靜養為事然亦不數數為之也居家以司馬溫公雜儀從事閨門內外斬斬僅使什物飲饌皆有矩度以士業付其子而觀其成涇渭內寘而詞

氣歎洽未嘗失色於人人亦未有以非意干之者海內  
名流多以氣味相與每從其族丈見素公遊特器重之  
日擴所未聞學益精詣詩有頤晦集梓行若干卷大司  
徒邊公貢諸弟考功達序其端謂其詩有盛唐人風韻  
讀之者令人心醉焉余與翠庭嘗與仕而休者數人倣  
古結社頤晦以屢招獨以布衣預焉古所謂逸民獨行  
之士若頤晦者非邪重袍高帽古貌脩髯瞻其像可以  
知其人矣贊曰古者士舉於鄉起巖穴而登卿相者有

矣漢去古未遠三公察舉公車徵召有孝弟力田賢良  
文學經明行脩之類亦往往得人而用之自科舉之制  
興而諸科遂廢士雖有異能足以經世澤物竟阨於不  
得施若頤晦者使階一命之寄其所建立豈愧科甲之  
士乎惜哉雖然即其所蘊亦足以暴於世而垂之不朽  
矣

黃郡丞如雍巾服像贊

頎然王立容之舒也瑩然丹渥色之愉也候色而言占



足以趨儼然禮度之不踰也堆床袍笏君家故物而葛巾野服亦奚慕乎山澤之癯家學淵源文軌道樞惕然而深省思振先烈其獨不懼與其四如與

王美璞像贊

教不問贊喪自守廬人集于菀我集于樗故自謂曰東愚儼乎其容之肅溫乎其色之愉衣巾楚楚舉止于于望而知其為讀書考禮之儒

陳敦和行樂贊

貌偉而豐神清而靜家學得元方之傳世澤衍太丘之  
盛奚蠲屈而未伸豈遲速而有命左琴右書優游嘯詠  
維石之奇維竹之勁諦觀物理會予情性

劉子賢像贊

先生未嘗以貌假人疾且革所親挾盡史來視先生背  
面而寢曰非吾志也今觀是圖果得先生之貌乎不得  
其貌況於先生之心乎愚嘗考其世纂其言述其行庶  
幾傳先生之神於千百世之後

贊宗衡冠帶

藻繪文章壁水流香樹標賢雋立幟科場聰明天植技  
藝兼長堪輿得秘衆史亦良是謂不世竒才有儒者氣  
象以故天朝褒異錫之冠裳

山齋文集卷二十

欽定四庫全書

山齋文集卷二十一

明 鄭岳 撰

祭文

祭尚書林竹田公文

昔正德間吾閩諸老同時謝政若太宰泉山林公司徒  
成齋林公都憲新齋王公與我竹田林公皆以耆德請  
老家居出入聯輿時節燕會人望之若羣仙然泉山坦

洞愛人成齋約身勵行新齋英偉敏達公處於其間宅  
心篤厚勤已務施大纍泉山溫慎自將不露圭角大纍  
成齋而材識精練較之新齋疑又過之要其所就各能  
成章為閩一時人物之盛十餘年來泉山諸老相繼淪  
謝獨公靈光歸然今又已矣國亡耆舊鄉失典刑其誰  
不悲如岳迂陋誤被深知逆藩構禍力拯于危去秋一  
見肝膈相語悽然感懷已覺淚枯詎意淹留遂成永別  
嗚呼古人災難絮酒千里赴喪茲隔數舍不能匍匐往

哭深愧知己之報尚圖文字紀述以垂不朽惟公其歆之

又祭竹田公出殯文

維年月日南京工部尚書贈太子少保竹田林公賜葬妙峯山之原岳以道阻病羈不能往助執紼遣子泓致薄奠而告以詞曰惟公德性冲融宦業炫赫盛滿弗居歸休林壑推厥波餘惠及三族鄉國著龜於公焉卜望耄考終神遊寥廓帝念舊臣勞蹟宜錄贈官祭葬恩數

繁縟哀榮始終寔收完局我猥受知恩同骨肉北望心  
哀心往跡踟躕束芻遺奠輸此哀曲

祭旌忠祠文

正德己卯夏六月十四日寧藩逆賊宸濠叛巡撫都御史孫燧按察

司副使許逵即日同死忠而督儲南京戶部主事馬思聰布政司參議黃宏以械繫囚辱

亦先後卒祠祀四

公扁曰旌忠云

逆藩蓄亂蓋已有年威劫守臣毒流江壖我罹其殃幸  
全首領永清再謫益驕以逞自古亂賊忠正為仇一朝  
發難勢不但休孫公許公甘心就戮惟黃及馬義亦不



辱生而幸免死而完節不朽者存於今為烈惟皇軫念  
首詔褒錄尚書都憲卹典溥溥念惟四公並宜血食少  
參主政恩當次及我猥起廢復撫是邦瞻拜遺像目瞬  
心降議飾新祠用稱明詔先茲告虔撫膺一弔

祭時雨叔祖及其子以正叔文

惟公之德實殖而豐措範鄉閭巍然朴茂長者之風爰  
暨公子聰慧夾閭厄於數竒飛不盡翰而能勤嗣公志  
以拓公開植之功壺山之南壽水之東允稱壽俊而享

有盛福者必首齒乎公天不憖遺公遽捐館而公之子亦飄泊殷墟不越歲而返觀于堂善門寡祐典刑日亡暨獲筮吉爰肇芥封岳泰在宗戚泣視公寔有涕汪洋崇肴于俎載酒于觴臨風一奠文以告衷

祭吳臨淵憲副文

嗚呼同社七人公今逝矣撫跡傷懷其何能已公資樸茂公性寬慈母我負人寧人我欺蚤掇巍科迴翔郎署執法臬臺建牙邊戍盡瘁効蹟蓋亦有年丘園繫念拂

衣來旋迺拉吾儕歷尋幽勝衣巾古雅優游觴咏斯文  
情誼篤老彌真睢陽洛濱庶幾昔人公方稀年一疾遂  
劇迨旣彌留作詩永訣採藥武夷遺世登仙死生超脫  
夫豈偶然老成忠厚典刑日遠叔風斯頽如水撒捷真  
率社規永矢弗諼茲辰會哭薄奠告虔

祭大理丞李壺塘文

惟公系出有唐制幹之裔奕葉流光歟聲世繼公有異  
稟俊爽踔厲擣辭振策芥拾科第出宰桐鄉朱邑高跂

入為御史桓驄遠避迺總臺章迺丞棘寺羣僚拱手漢  
廷老吏人各有能文章政治公實兼之蓄未盡試翠壺  
白塘菟裘終計招我朋儕歌遊勝地晚忽嬰疾苦於踈  
盤年幾及稀溘爾長逝慨念平生俯仰一世會哭寢門  
潜然出涕

祭壻黃君壽文

吾與若翁同舉于鄉同官于部志莫逆也方若初生吾  
女在孕誓言結婚成佳匹也若翁不幸中道殞絕吾為

若憂未成立也習性沉靜儉朴寡言我為若喜無縱佚也  
連產皆女一男不育吾謂若少俟他日也吾昔起廢相  
從省下大誼諄諄誨以密也別始逾年書報若亡殷憂  
無端朝復夕也兩世一身終鮮兄弟姑婦相依何慘戚  
也謂有遺腹或存一脉既又生女望如失也吾囑吾女  
誓志弗辱撫教嗣子永血食也萬里寄奠搦筆涕零若  
尚有知鑒予臆也

祭同年陳珍之文

公為諸生已負奇氣公居學職已負達才大器晚成果  
射甲科遂擢御史魯汰僧田丰裁凜凜持斧入蜀詔取  
妖僧公疏止之土番犯境公毅平之閤寺侵權公槩清  
之乃出藩臬兩賑浙貧輿論尸公重茲鎮卿馬政頽弛  
公至一新駭牝蕃息台秩旦榮一朝遘疾忽然僊昇不  
肖與公叨在年末欲承風旨公已近觀式薦陳詞英爽  
如昔嗚呼哀哉尚享

山齋文集卷二十一

欽定四庫全書

山齋文集卷二十二

明 鄭岳 撰

書

報閣老蔣敬所公書

聖主眷念策立元功大加封拜此近代所未有也我太祖開基定制與漢唐宋不同文臣不許封公侯是以楊文敏金文靖楊文貞皆有非常之功僅止加官兼俸廕

子而已固未嘗受封拜也制勅之下舉朝仰企以觀諸  
元老所以處此者謂必力辭則朝廷謂大臣體國不卹  
其家益敬信而倚毗之矣宦寺勲戚謂儒臣自重不可  
羅以寵祿益嚴憚而屈服之矣中外臣僚亦咸謂宰執  
讓功自消其干進速化之念矣其係於國體士風豈細  
故哉

壬戌郡城陷全書無  
存僅記中之警語云

寄謝林竹田書二

某不幸遭此奇禍親故背馳公獨惓惓救卹兼致厚貺



自以為莫大之惠矣詎意復枉茲行脫某于危舉家百  
十指皆得生還田里者皆公賜也途中跋涉委曲周視  
骨肉至情亦不過是不知何以得此於公固當子孫世  
世追念于無窮也小兒泓既返省城遂以二十一日發  
舟茲過鉛山幸入閩境途暑因往武夷一憩歷覽名勝  
情趣悠然恐家中懸望遣泓先歸遂至省城叩謝府中  
相待始末泓能道之統祈垂炤不備

某生還故里士夫親舊咸相慰唁且謂此舉非公幹旋

安能有是公一舉手而士類咸受其賜矣豈特不肖一身一家之惠哉所喜老母暮齡尚爾康健奉歡膝下以終天年實天假之也知幸知幸乞休前疏此時想已得報後疏曾發行否台候近復何如天氣漸涼人事稍閒精力當能復舊强健乞身古人所貴而始終完名尤為盛節某禍變之餘百念俱灰耽玩山水時從見素諸公游了此餘生足矣自抵家即欲遣人奉候起居人事冗奪因循至今愧罪愧罪頑子親期已近且閔其孱弱故

不遣之來併希鈞照

啟廖雲卿郡伯

索居寡便久缺奉問緬惟宦況清嘉為慰莆士習日不  
如前而氣運亦否一二年間三京堂皆去位其他妙年  
英畧相繼歸卧今列在朝著者僅三四人耳前無是也  
如何如何執事碩學清操久處遐荒未見一轉遷又如  
何如何想冰蘖襟懷亦不以喧寂為意也莆來賢操存  
堅確終其身可保者執事與陳若寶而已某邇來益覺

衰落不堪鞭策眷屬幸皆粗遣令姪世篤甚能儉約立  
家世行勤學才亦可進想亦欲聞也餘草草不克悉

與族祖

某在任將滿四年茲當進表北上且圖考滿之便愧無  
他才能朝夕謹守清苦恐遭廢黜重為祖宗門戶之羞  
待傑回當能備悉簿有棉花少許將遠情耳

與宋良翰大尹

恭審科場畢事得免北行甚善甚善跋涉風寒殆不易

堪況又有巨費邪清名籍籍播於嶺表振家聲而副物  
望亦姻舊所共榮也公道終不負人願自愛願自愛

與方思道憲副

在衢與寒谷預議託族子士望先容奉屈一會急足未  
至而辱使先臨詞旨諄復及披閱諸作如入武庫應接  
不暇自是一種風情絕粒烟火者也特恨無能面領至  
教仰嘆仰嘆小集并近作漫往雷門布鼓聊博一笑

柬陳時周侍御 三

昔人有言一日養不以三公換而家貧親老則有為祿仕者往時林公長深出於自陳而且遠違其鄉若兄杜門掃軌無求於人而恩數自天尤為難得道尊足以勵俗地近可以養母何樂如之某始至江西訟牒紛然恐綿劣不堪如何如何前示家兄序文甚精當所謂詳而有體者也某始讀之不覺流涕蓋有感于往事也末後數語謹當與兄共勉之

近得家信附錄尊兄乞歸之疏讀之愴然殆所謂流出

肺腑者也古人以善養不以祿養兄得之矣某亦報劉  
日短之時兼以家姊舍妹相繼喪逝情不可堪而一官  
羈縻如何如何中世士大夫以官為家罷則無所於歸  
兄之篤行安貧處人所難而吾莆名公先輩之風賴以  
不墜其為士俗之助多矣某嚮往不逮竊亦不敢自棄  
時幸有以教之瑣瑣不備

周長教來恭審尊體漸適太孺人康健如昨足慰足慰  
充間尚未有消息未免復為兄慮近者江西有一術者

能談貴造方此三年決然有子術者之言多訣而無意之談則為可信天命人事固當久而定也偶聞王方伯明醫雜著所論血病不宜服人參黃耆以皆氣藥氣盛則血益衰兄之病正坐血耗耳參耆似不宜服只以四物為主此書不知亦曾見否家兄收有刻本可取觀也昔呂獻可疏云臣本無宿疾偶值醫者用術乖方其言蓋有所託今之疾亦甚矣而醫者豈特乖方而已奈何奈何便中謹此通問無任懇懇伏惟珍衛不宣



寄竹田司空

數月來缺於奉狀豈勝愧仰去冬小兒畢姻繼以先世  
荒隴重加脩砌人事匆冗遂爾踈闊然此心未嘗一日  
不繫戀於左右也亦久不承台札不知出處何如繼所  
陳疏亦嘗得旨否尊體近來想益康裕兩廣事情想已  
處分無足以煩尊慮矣凡此皆切切所欲聞者也黃伯  
望自赴廣不得手書莫知事已如何淹延尚未得歸而  
吏部更調竟亦不為之所今為伯望計者只宜決策休

致耳臨楮悵悵不盡所欲言人還伏惟示教

復子成

承手札及疏稿具悉立志不草草且欲退處一步甚善然自來無此例巖翁初聞感然不喜區區與素翁亦快快不欲為呈也盛价以有命必欲進竟亦立案徽士夫聞之亦力阻第初政未久而風聲已能動人如是幸寬慰大抵治劇須簡而舉其尤要者若一二勞心務求件件如意日不暇給且人之精力有限安得不困且病哉

凡事且循舊規不可過激郡中公用只引錢一項別復去之則束手縛脚一事做不得豈不後悔聞同官亦有難處者此固他山之石也盛价回畧此布悃素翁及鄉之知舊皆此致意不具

與李子光

人自京回道賢親以文學受知公卿而下咸加器重甚忙且勞固不失儒家味也甚慰甚慰令伯年彌高精神未衰屹然為鄉耆彥所生學加進館中合試多在首列

殆不易得遠承書儀及示各起奏札知叙復始末但未見一字行至本省部中之議何如同事胡憲長亦未見處置先母服未闋又值此時大是難出似舊退閒足矣繼聞又有薦者虞伍二繡衣之疏未見全文便間乞錄示瑣瑣幸惟照諒

與邵提學

瞻奉未即無任引領輒有冒干伏乞垂聽舍親林憲副甫後進有志節者其所自待也良厚直少慙若疏耳近

聞周王巖督過其家是蓋憲體宜然而羣言籍籍咸謂  
因憲副疎慝而致罪也僕竊謂不然王巖於莆有父母  
舊恩於當今為第一流人物在憲副所當敬事而終身  
焉亦何所致罪況大人君子曠度宏量於人何所不容  
縱有小過亦當包涵而覆育之又況怒及其家邪以此  
知必不然然莆俗近亦薄苟有宿怨於其家者皆窺伺  
意向而指害之恐王巖至是亦難處矣何如何如衣冠  
之辱亦所宜念也夫子得罪於父母因諸姑伯叔而解

之執事非憲副所恃而為之解乎幸委曲一言不勝惓惓至望

柬竹田

嚮承寄謄黃伏讀具見朝廷優禮大臣始終之義而公平生忠勤備載天語足以垂之後世士君子登仕途完名薦寵如公古今豈多得哉且與冢宰司徒二公鼎峙閩中尤為鄉邦一時之盛仰羨仰羨竊擬獻圖因陳敦賢偶恙頗久未能下筆近瘥又適勅至不免人事紛擾

茲方為之見素之文諸公之詩業且就矣稽慢之咎無任悚仄伏惟照貸不宣

報竹田

廖千兵來備道晉拜左右辱承優待過其涯分感愧無量且審地方意外之擾悚息悚息幸藉天之福掩捕渠魁餘黨詘伏不然其禍可勝言哉省城一搖四方響應矣所委族譜序文謹依原稿稍加修飾自作小跋於後愧穉陋不足以傳遠耳三代而後無世卿世大夫故大

宗之法廢今士夫家所得行者小宗而已然不立一始祖則不能合族原稿所議巖耕公為別子梅隱公為繼別恐於禮不合某意且祀萬原公百世之後固當以公為不遷之祖矣故於跋尾及之蘭階佳兆如何似聞上舍公子即欲上京某與素翁私論今在官者尚欲乞歸終養公僅一子聽其遠去恐於情義想有未安未行可止果行止須求南監寄一名速歸省侍如何恃愛敢爾直突併祈照察



與方都憲書畧

僧之所憚者公也族之所恃者亦公也公即不言僧且憚之況為之力主者乎向伯固在上清公嘗道其非豈自非之而又蹈之者哉殆不然也且令先公使千金以口舌折強敵今帖帖於淫昏之鬼之後其能安之乎恐非所以處令先公也鄙見如此惟裁之何如

復林子成 二

前數日稍聞尊翁之訃方切悲悼恨不能匍匐往吊深

愧古人之報知己也忽承价至得教墨始知疾革時日  
且以行狀見委此豈敢辭第恐文字鄙猥不能紀述勛  
德誌銘素翁雖在病中亦勉為之即欲遣人走致薄奠  
姑候文字脫稿一併齎上所惠盛儀誼不可受追憶尊  
翁恩厚愧無以圖報况區區鄙文耶素翁亦用此意价  
還布悃惟照在不具

承委行狀拙筆不足以盡載尊翁勛德聊據所述系而  
書之中亦參以平生所知未免掛漏素翁之銘則固足

傳也幣一端香一炷祭文一軸專人齋奉靈筵庸伸哀  
感之私區區之情殊未能罄也如何如何輒復有告尊  
翁平生辛苦創立所以貽後者家事固宜從容善處以  
全尊翁令名此執事之孝也區區所祝惟在於是幸惟  
留念

東王時行兵憲

嚮於令親處獲觀手札備悉官下動靜及出師勞績甚  
慰似聞贛州芟刈太慘兩廣之寇如蔓草然今春除去

來春又長一番徒費兵糧而為冒功者地耳撫禦得宜  
不然設奇以撲其首惡可已如何如何宋良翰居官畏  
慎地劇人頑比聞該道朱公責以苛禮頗懷恚怒迺以  
註誤照提恐有文致之辜渠當考滿未得行所遭如此  
歸志已決家故裕母老子幼且鑒前車如吳如張俱至  
傾敗不如蚤退之為高也生與松厓已為作書達之揔  
督楊公乞放之歸執事幸為鼎言於該道處解釋毋致  
牽絆幸甚聞予約亦為刁惡所陷贓至六百計其家貲

不能償三之一當道亦太深矣林下亦為之憂故附及之餘情萬萬不能悉

又

行急承賻唁感愧感愧為官謀不為家謀備悉雅志而才力足以張之意不待書考當有以見處矣閏月林廷元朝正回道不肖擬補蜀藩俟俞旨仗倆若此時候如此籌之士夫莫適進止執事何以教之聖駕北旋海內稍慰千乘萬騎公私益耗矣宋潮陽事勢已減十之七

八多謝多謝甫士夫亦咸動色相慰況其家乎大巡恐  
難再解總督公倘念年家更為末減俾以布衣歸第足  
矣此於情法似亦無妨然尤望旋幹之力也鄭少參極  
荷致力崔都閫深於非所照恤均乞致謝私鄉事亦少  
能道之不瑣瑣

山齋文集卷二十二

欽定四庫全書

山齋文集卷二十三

明 鄭岳 撰

說

崑字子仰說

諸弟崑筮日將冠來致叔氏之命曰崑性猥朴委志鄉俗學竟無成今年幾弱冠矣猶有童心幸字而訓之俾循省策勵以無墜門戶重遺先祖父之辱予曰諾按崑

合崙為一山河源出焉漢張騫使大宛窮河源而崑崙  
實未嘗到爾見悶摩尼謂之崑崙而河有二源東北流  
至葱嶺而合天下大勢西北多山水循山而下崑崙在  
西北最高處謂之天柱其高萬一千里背夷而面華天  
下之山皆祖之方士家謂人首為崑崙亦借其高而言  
之耳詩曰高山仰止又曰泰山巖巖魯邦所瞻泰山固  
崑崙之支山也字崑曰予仰可乎夫山之峻嶒峻絕昂  
霄入雲吾視之以高邁自奮山之廣厚鎮靜橫亘古今



吾視之以弘毅自立支阜而蜿蜒陂陀而聯續若抑而  
伏也若拱而揖也吾視之以孝弟恭遜守其分之常而  
不敢肆視其草木之產寶藏之興足以資民用吾可不  
務生植畜聚而舍所事以嬉乎此皆自山發也抑平地  
一簣吾自往之豈徒引領於堆青積翠之間已耶崑再  
拜曰謹受教矣崑之弟崙亦可因而預教之乎余曰可  
字崙以于瞻義同于仰俟其冠以是命之毋待贅書也  
請以是而復叔氏之命

稼坂黃氏四子字說

稼坂黃氏著姓也其先自橫山遷稼坂以詩禮世其家  
吾姑氏歸焉傳再世至桂行慶九者中表姪也慶九祖  
行六人今傳者四人父行二人今傳者慶九一人而已  
慶九今生四子矣盛衰相乘理數必然要未即能成立  
而寢寢向盛矣慶九長子曰雲臺筮日將冠并其季春  
臺烏臺靈臺請字為訓且曰是固吾祖母一脈之遺也  
不然豈敢輕瀆余惟光武中興英賢翊運明帝追念其

功圖形雲臺爰字雲臺曰思勲老氏云衆人熙熙如登春  
臺陰陽交通萬物咸亨登高望之生意滿睫爰字春臺  
曰思登鳥臺者御史府也漢朱博為御史府中列栢鳥  
集其上當時以為瑞字以思瑞可矣靈臺者文王所作  
也方其經始庶民子來不日成之文王之政怙冒西北  
而民心效順如是字以思順可矣幸際明時無所用武  
圉一世民物於春臺中何其盛也然佚能思初沐浴膏  
澤而歌詠勤苦義奚敢忘烏為孝烏昔人以此曾參文

王之時厥民時叙若夫豪傑之士雖無文王猶興是在  
四子者自勉而已各致其思相觀而善以毋忘故家詩  
禮之澤黃之盛自茲始矣

山齋文集卷二十三

欽定四庫全書

山齋文集卷二十四

明 鄭岳 撰

雜文

感知清頌

正德八年某以迂戇積忤禍叵測同時寮舊懼將及已  
依違避就間怵於勢啗於利落阱下石附和以成文某  
方坐井無所於告一惟委命於天而已竹田林公自嶺

南聞之力為申救至再不已且遺十金為供費明年擢  
大司空留都乃度嶺而西至洪面啓寧藩釋某家累同  
歸于閩凡其所以救卹周防之者殆無遺力某公鄉後  
進嘗為屬吏非有私厚於公方其危難顛沛之中親與  
交漠然公獨繫戀救卹之如此豈易得者哉昔郭令公  
納官以貫李白王佑以百口保符彥卿史冊傳為盛事  
其後子孫貴顯累世或位至三公論者以為佑賢庇善  
之報公所存無愧二公平生敷歷中外所以護養士氣

保全善類又豈特區區一人而已耶以此卜公之植德委祉以貽來世者蓋駸駸乎未可量也某既釋罪歸田圖報無階謹製韻語賡詠成帙幸藉是編之傳俾酬知已於萬一云

跋陳古崖詩選

汝瀾因刻是集欲附以誌銘等作予曰不類迺感然曰誦其詩不知其人可乎予曰詩本性情讀是詩見之矣且近世誌銘類多諛詞人不之信無已則郡乘之列傳乎

其文約其事覈且非一家之書也迺刻二傳

族祖清公墓誌銘跋

右族祖清公墓誌銘得之桃源洞口董山民家掘地出之宗人御史洛書力致歸我以吾蒲坂物也其石理頗麓刻字小宛宛可讀誌中所載世次甚明有可以正家譜之缺誤者如云露公梁陳時人唐觀察常袞推尊鄉先師表贈太府卿諸家之譜皆無之此必別有所據又謂致政楷公生脩公遷塗坂塗坂即蒲坂也脩公官南



臺侍御吾家舊祠神主題云始祖南臺侍御二十二冲  
遠公舊傳義遜契亦云蒲坂鄭氏南臺二十二侍御之  
後而家譜乃沒其官是以新祠題主以譜為據又譜云  
楷公生二子信僖僖公生衍衍公生致一致一公生冲  
遠公今誌直以楷公生脩公夫以都統瑄公宋藝祖時  
人副使得南公以景炎丙子葬于石門洞則宋末人矣  
宋歷年三百約以世數不應一十四世今以楷公生脩  
公僅一十一世且脩與信僖字皆從人而脩字冲遠其

義甚合舉此數端先後契勘譜之誤明矣夫疑以傳疑非有的據不敢輕改惟此誌石埋伏百四十年去之五六十里一旦於荒山古隴中得之且免毀棄缺裂之禍使得有案據上正數十世沿襲之誤其所關繫豈細哉抑亦精神一脉有所感召固非偶然而出也於是改題神主修正譜牒置此石於祠壁而誌其顛末以詔後人

題孝節雙芳卷

自大道隱而世崇詭異故劉向稱通儒其傳孝子節婦  
盡千餘年僅僅如許又多奇絕而鮮純篤豈其遺者多  
與抑亦特取難甚者以示勸與然奇者或詭於道而純  
篤者非可以勉而能也壺前鄭君子會業儒純孝室張  
氏士族女也苦節厲行孚浹鄉邦無異議焉并蒂之祥  
斷指之義蓋咏歌之者非一其子世光繪為圖題曰孝  
節雙芳請予弁諸首予惟子會之孝徵於物又為親而  
喪其軀張氏斷指以示信又傾貲以送諸姑皆事之近

於異者也然孝子之事親也知有親而不知有已子會之孝知有親而已身固弗論也婦之節也不死其夫而已張氏斷指以殉而不敢以家故薄其諸姊妹也是無以有已而惟君子之命而已故守身以事親子會之孝未盡焉而心則甚純立孤與死蓋張氏能兼盡之也然使天假以年子會得出而用世則以身殉國死生以之必其人也張氏之子弗克自樹則順夫之命適足以替其家而已是又有天者以主乎其間吾聞世光之子讀

書過目輒成誦則天又必昌之以廣子會之傳而侈張氏之事於無窮顧其所可與者在純篤而不在奇絕故特發衆論所未及而序之如此

陳林墳山紀事

祖有墳山一所坐陳林落前元時葬我八世祖七十八朝奉公暨八世叔祖八十二朝奉公墳墓二所在上元時立有祭租元季多故租多出售他姓我高祖大七公以僅存祭租二十四石與長房曾孫大五公我第三房

曾孫貴一公貴二公貴三公輪收祭掃至今不廢其山  
原係長房報戶永樂元年長房大五公已故絕貴一公  
收回本山五畝七分入戶納糧隨葬德十公及貴一公  
在上至天順六年貴三公之孫時雨公復就大五公妻  
林二姐戶內收回山八畝二分入戶納糧成化等年續  
葬貴三公時雨公以下墳墓四所在上近因各房子孫  
執稱祖山有分時往砍伐松木時雨公之孫舜卿靜卿  
等慮其傷殘風水屢行禁阻且欲因納糧認為己山以

此紛紛爭論不平今以事理議斷其山原葬朝奉公墳墓經今二百餘年矣今見在四房皆朝奉公派下子孫墳既同祖則山為衆山也明矣且貴一公時雨公二次所收俱是本山不係私買別姓或別房人物業不然豈無文契可證及查成化八年本府丈量條段內載本山四至實該三十二畝九分明開業主鄭淑清鄭時雨鄭時德三人姓名淑清公則貴二公之孫也其為衆山又復何疑若以丈量畝數論之每房該八畝有零若以報

戶納糧論之僅一十四畝貴一公貴三公二房先後葬墳六所合除所報山一十四畝與伊載墳外餘山盡合歸衆但自茲以後再不許各房子孫於本山砌墳各墳切近松木俱要存留遮蔭風水其離墳無碍山所松木每三年一次衆賣與人落楸銀兩入祠公用如有私砍者每一根罰銀一錢示衆毋挾私見變亂舊規毋貪小利破壞大體上以延祖宗覆庇之澤下以全宗族敦睦之風茲特詳述顛末暨今戒約付各房收執存照且備



錄于烝嘗簿及族譜以示子孫永宜遵守如敢違悖執此鳴官究治族弟輝卿八十二朝奉公八世孫也自其高祖貴四公與我四房輪收烝嘗租致祭祠墓至其祖賢弼公將祭田分去一畝五分遂不預祭其父宜獻又將所分祭田典與族衆故今只作四房輪收然而祠堂墓山尚應有分今議冬至致祭七十八朝奉公墓就請八十二朝奉公祔食輝卿於祠於墓俱當預其祭掃因附記於此

族祠祭紀

莆右族必有祠祠必有祭祭之豐約視田之所入稍存  
餘利以優族人禮義興焉吾鄭族祠自吾九世祖副使  
公始立祭田計租六十石元季政繁大半入他姓吾高  
祖大七公以僅存田租二十四大石照舊輪收祭掃今  
扣小石三十三石一斗族衆嘗欲盡賣之賴吾母太淑  
人阻止遂傳至今歲冬至祭副使公及朝奉公墓中元  
舊設醮後改為祭矣正月八日處士百十三公忌祭就

掃墓四月初三日供僧初五日妣林氏忌祭獨於始祖  
先祖合祭顧缺焉程伊川謂冬至祭始祖立春祭先祖  
朱子晚疑其僭然今族祠既立始祖神位不得不倣程  
子之意而行之也禮謂厥初生民為始祖吾祠肇祀始  
遷南湖太府卿公為始祖始遷桃源刺史公始遷蒲坂  
侍御公皆謂之先祖副使公處士公則嘗立祭田岳不  
肖賴先世遺慶幸而有今欲圖報本力固未贍迺以田  
租十四石三斗入祠用補立春之祭兄嶠撥租五石五

斗以充冬至之祭嗚呼私田易售祭田獨得久存以其  
主之者衆也我後子孫苟有人心不得擬賣祭田以滅  
先祖之祀不孝之大者也族之賢者必能執之以告於  
官縱有戶役宜照丁糧俱辦其或脩祠脩墓義不可已  
則許抽租或折祭為之子孫仕宦若富而好義續增祭  
田猶有望也今將房分田段租額并祭祀月日品物儀  
式酌豐約立為定規以與各房從事云

世祠祭田紀範

莆世族祭田遠自唐宋傳至今尚存以族衆相維不得私售若私田不過數世輒為他人有矣以是知祭田最重上以延宗祀下以遺子孫可為經久之圖吾起家艱難鏡觀是事雖私田不多必欲增立祭田居官中外三十年來祿積買置計租一百五十餘石今世祠始建吾兄弟各割租二十石及祖遺麥豆租通計二百三十石有奇內取石泉院坑租四十九石五斗為墓田子孫應當軍戶役者給租二十石應當民戶役者給租一十石各

與日食餘皆為祠田總名曰祭田祠墓二田分年遞收  
歲有豐儉率取十之二別貯木倉至次年三四月易錢  
入公篋又倣他族規例長男生彌月者入銀一兩長男  
婚而廟見者入銀二兩次男以下各減其半貧則衆議  
量減公篋所貯主祀者司其數富而知義者司其財凡  
以備脩祠墓及一切公費子孫能讀書選入學者助銀  
一兩預秋試者助銀一兩預春試者助銀五兩男女過  
時不能婚孤子節婦無所依及喪不能葬者俱量為資

給其子孫仕宦及積有厚產者量力買租入祠凡祭田糧差伯仲二房均辦向後本房子孫毋以立田自我規規藉口致傷和氣甚至侵奪變賣別房子孫亦毋以收租納糧視為共分物業希圖侵沒近見人家不肖子孫指以戶役或與人爭訟輒賣祭田殄絕祀典不孝之大者也吾宗不幸有是族衆協力阻執告之官治罪然此特舉其大凡耳尊祖睦族因時處宜固望賢子孫推廣而潤色之茲將祭田段落畝數開列如左

鄭汝學壙誌

汝學生於成化癸巳四月二十八日卒於嘉靖丁亥三月二十九日享年五十有五卒卯歲其子質夫始克襄葬事獲地於維新里牛眠岡之陽未山丑向即穴以筮貞否悔觀筮者曰吉是為金來居土之象宜稍高承九四之動可也後必有蒙其祉而仕於王朝者既定穴葬未有日又筮貞大壯者大事吉也需者需此以定也且乾金為體震木為用日宜木震變之坎水木相生必壬



寅也果壬寅寔為是歲十二月念三日也諱明德字汝  
學別號直菴生平篤義好禮勤本厚植曠懷雅度於人  
不少疑里有枉直者片詞而解又輕財樂施無所吝惜  
賑窮賙乏汲汲如不及舉先世不能葬者四喪皆極完  
綴性方嚴治家有度子姪輩見之儼然無敢譁言規模  
宏闊欲有所創作以恢裕世業竟費志以歿命也謂之  
何哉卒之日人皆為之悼惜疾將革衆咸請治命只瞑  
目答曰吾有後吾有後夫復何言遂終於正寢嗚呼夫

以愛親敬兄睦鄰恤族慎終追遠損己益人皆人所難者而享年止此其有後也宜哉矧視履考占無往不吉則宜其言之徵也不其信然矣乎配黃氏子男二長即質夫次亨夫女一適陳學遠孫男二穎頰考琴字宜和大父志字寧紹皆隱德弗耀出唐中郎將莊公後則寔宋漁仲大儒裔云

山齋文集卷二十四